

FORUM


www.forumtydskrif.co.za | November 2022

AfriForum Tydskrif

ONS BOU vir die *toekoms*



ISSN 2313-1144



9 772313 114002

R15,95 (BTW ING.)

Gratis aan lede

ONS BOU ...

want elke geslag neem verantwoordelikheid vir sy eie tyd

Kallie Kriel – uitvoerende hoof van AfriForum


Wyle prof. Carel Boshoff het tydens sy leeftyd telkens daarvoor voorspraak gemaak dat "elke geslag verantwoordelikheid vir sy eie tyd moet neem". Boshoff se leuse van dekades gelede is vandag nog net so geldig.

Dit was natuurlik ook geldig oor al die eeue waartydens die Westerse samelewings ontwikkel en vooruitgegaan het. Die denker Edmund Burke het byvoorbeeld in die 18de eeu ook geskryf dat die samelewing "'n kontrak is tussen dié wat reeds dood is, dié wat lewe en dié wat nog gebore moet word".

Net so is ons as huidige geslag Afrikaners en Afrikaanssprekendes 'n sleutelskakel tussen die geslagte wat ons voorafgegaan het en die geslagte wat kom. Dit gee sin aan die lewe om te weet dat elkeen van ons nie net 'n ongebonde individu is wat toevallig hier is nie, maar dat elke geslag die geleentheid het om hulle roeping op te neem om te werk aan iets groter as hulleself, naamlik om soos Oom Paul Kruger gesê het te neem wat goed is uit die verlede en die toekoms daarop te bou. 'n Beter toekoms vir ons, ons gesinne, ons gemeenskappe en die geslagte wat kom.

Voorspel die toekoms deur dit self te bou

Ons geslag word vandag gekonfronteer met 'n onwerkbare sentralistiese politieke bedeling wat in 'n korruptokrasie en kakistokrasie ontaard het. Die vraag is hoe ons geslag op die brouwerk wat ons om ons sien moet reageer. Ons kan toeskouers wees en net toekyk of ons kan self die toekoms bou



wat ons vir ons en ons nageslag wil hê. AfriForum en die Solidariteit Beweging waarvan ons trots deel is, het laasgenoemde pad gekies, naamlik om self 'n beter hede en toekoms te bou. Alan Kay was in die kol toe hy gesê het dat die enigste wyse waarop die toekoms voorspel

“

Opsommend is die kern van AfriForum se aktiwiteite dat gemeenskapsfederalisme gebou moet word deur die vestiging van sterk, selfstandige gemeenskappe en instellings.

kan word is om dit self te bou.

Dié kontrak waarna Burke verwys wat tussen ons geslag en vorige geslagte bestaan, beteken geensins

dat ons geslag moet dink dat vorige geslagte supermense sonder foute was, wie se werkswyse almal slaafs nagevolg moet word nie. Die teendeel is waar. Ons geslag kan met waardering kennis neem van vorige geslagte se talle suksesse en natuurlik ook die foute wat gemaak is beoordeel met inagneming van die konteks van die tyd waarin hulle geleef het. Dit bied aan ons geslag 'n stewige platform vanwaar 'n nuwe toekoms gebou kan word met inagneming van vandag se werklikhede en uitdagings. Ons geslag is ook nie foutloos nie, maar gelukkig gee ons roeping aan ons as gewone mense die geleentheid om in moeilike omstandighede buitengewone suksesse te behaal as ons kies om met ywer en deursettingsvermoë te bou.

Vernuwend denke en federale plan

Die vernuwend denke en energie van nuwe geslagte is onontbeerlik vir enige kultuurgemeenskap se vooruitgang. Dit geld ook vir

Afrikaners. Eens beproefde suksesvolle werkswyses van 'n vorige geslag kan soms klaaglik misluk in nuwe omstandighede. 'n Goeie voorbeeld hiervan in ons geskiedenis is genl. Piet Joubert. Joubert se briljante oorlogstrategie as kommandant-generaal van die Zuid-Afrikaanse Republiek (ZAR) het 'n sleutelrol gespeel om die Britte te verslaan tydens die Eerste Vryheidsoorlog wat in 1881 beëindig is. Met die verandering van omstandighede het dieselfde eens briljante generaal se leierskap byna twee dekades later tydens die Tweede Vryheidsoorlog op 'n laagtepunt geëindig. Die vernuwend denke van mense soos genl. De la Rey en andere het die Britte harde bene laat kou voordat hulle weens 'n oormag van getalle die oorhand kon kry.

Die nuwe omstandighede waarin ons geslag ons bevind vereis ook dat ons vernuwend dink oor hoe ons die huidige uitdagings van 'n mislukkende sentralistiese bedeling moet oorkom. AfriForum en die Solidariteit Beweging se sewebeen- federale toekomsplan bied 'n rigtinggewende plan aan die hand waarvan AfriForum, elke ander instelling van die Beweging en ander wat wil meewerk, op verskeie wyses en terreine kan bou.

Só bou AfriForum sterk, selfstandige gemeenskappe

AfriForum bou op 'n veelheid van terreine. Die omvang hiervan is te

groot om in hierdie artikel volledig uiteen te sit. Opsomming is die kern van AfriForum se aktiwiteite dat gemeenskapsfederalisme gebou moet word deur die vestiging van sterk, selfstandige gemeenskappe en instellings. Selfstandigheid vereis dat ons afhanklikheid van die staat soveel moontlik moet beperk en daarop fokus om deur 'n "Ons sal self"-ingesteldheid beheer oor ons toekoms te neem.

ENKELE TERREINE WAAROP AFRIFORUM TANS SAAM MET GEMEENSAPPE PRAKTIES UITVOERBARE PLANNE IMPLEMENTEER IS:

» Gemeenskapsveiligheid

AfriForum het reeds meer as 160 buurt- en plaaswagte landwyd waarin meer as 10 000 vrywilligers 'n sleutelrol speel om ons gemeenskappe veiliger te help maak. Ons veiligheidspecialiste werk saam met gemeenskappe om gebeurlikheidsplanne op te stel en bied talle opleidingsprogramme om goed opgeleide buurtwagte daar te stel. Die gebruik van tegnologie soos hommeltuie, slimmekameras, beheerkamers en radionetwerke word goed aangewend om as vermenigvuldiger te dien in die beveiliging van ons gemeenskappe. AfriForum se privaat sekuriteitsmaatskappy sonder winsoogmerk, Forum Sekuriteit, versterk AfriForum se gemeenskapsveiligheidsplan deur geakkrediteerde opleiding te kan bied en nuwe bevoegdhede tot die beskikking van ons veiligheidstrukture te stel.

» Selfdoengemeenskappe

AfriForum se plaaslike strukture speel 'n sleutelrol om deur selfdoenaktiwiteite selfstandigheid in ons gemeenskappe te bou. Omgewingsaangeleenthede, plaaslikeregeringsake, jeugontwikkeling en erfenisbewaring is van die terreine

waaraan ons plaaslike strukture met groot sukses bou. AfriForum se diensleweringmaatskappy sonder winsoogmerk, Pionier, het ook reeds in noodgevalle munisipale water- en rioolwerke bestuur, vullis verwyder en herwinningsaksies geloods. Hierdie vermoë om self dienste te lewer word tans verder uitgebou vir wanneer die geleentheid om self dienste te lewer homself voordoen, soos wat daar tans nuwe geleenthede vir privaat kragopwekking ontstaan het.

Ons bou nie alleen nie

Met die omvang van die taak wat voorlê is dit hooggewend om te weet dat AfriForum nie alleen bou nie. Daar is 'n rits bondgenote en vennote wat besig is om reusesukses te behaal in die projek om 'n toekoms te bou.

AfriForum se susterorganisasies in die Beweging bou op vele terreine. Op tersiêre onderrigvlak bied Sol-Tech en Akademia wêreldklas-gehalte-onderrig in Afrikaans aan deur onderskeidelik ambags- en universiteitsopleiding. Maroela Media is die grootste Afrikaanse mediaplatform in die wêreld en tel onder die topmediaplatforms in die land as na amptelike statistiek gekyk word oor die hoeveelheid artikels wat gelees word.

Die Skoleondersteuningsentrum (SOS) het reeds die virtuele Volkskool ontwikkel en werk aan planne vir bekostigbare privaat skole. Helpende Hand se span maatskaplike werkers versterk gemeenskappe, terwyl hulle studiefonds jaarliks meer as R50 miljoen se studiehulp bied. Solidariteit se beroepsnetwerk ondersteun ons mense in die werkplek, terwyl die FAK sy merk maak op kultuurterrein. Kanton, die Beweging se eiendomsontwikkelinginstelling, bou fisies ruimtes soos Sol-Tech en Akademia om veilige ruimtes vir Afrikaans te skep.

Hierdie suksesse kan ons hoop vir die toekoms gee. Ons sal self, want ons kan self!

Ek wil elke AfriForum-lid bedank vir sy/haar steun die afgelope jaar. Julle maak AfriForum sterk en sonder julle steun en met genade van Bo sou suksesse nie moontlik gewees het nie. Ek wens ook namens AfriForum vir almal van julle die Here se seën toe vir die komende Kerstyd. Mag elkeen inspirasie put uit die ware betekenis van Kersfees sodat ons ons roeping in 2023 ten volle sal kan uitleef.

Kallie Kriel